

嚴嵩字維中江西分宜人弘治己丑進士嘉靖十六年任二十一年入閣詳內閣

張璧字子象湖廣石首人正德辛未進士嘉靖二十一年任二十三年入閣詳內閣

費宗字子和江西廣信府鉛山縣人祖應麒生五男曰珣鄉貢士曰瑄舉進士貴州叅議曰璠以子文憲公宏貴贈少師曰璵卽宗父曰瑞鄉貢士璵娶張氏生宗在胎七月而誕弱僅盈掌然啼聲若鍾左耳下有七黑子識者知其非常人也長益穎異正德丁卯舉江西鄉試辛未舉進士選庶吉士讀中秘書癸酉授翰林院編修時寧濠陰蓄異志以婁氏故欲結納之宗拒弗